



Edgard Kelkboom un musico cu inspiracion propio

Harpa den su man ta magia pa scucha y inspiracion pa alma.

For di ki tempo Edgard a cuminsa toca harpa?

Na aña 1966-67 nos tabata tin un grupo yama "Alma Crioyo" cu tabata toca na "Cactus Inn". E tempo ey mi tabata toca Maraca. E persona cu tabata toca Harpa pa nos riba un dia no por a bin pa un of otro motibo, mi a hiba e Harpa mi cas, mi a cuminsa practica y asina mi a cuminsa toca e instrumento aki.

Unda Edgard a siña toca harpa?

Mi tin e don cu mi ta compronde musica pa oido basta lihe, dor cu mi a lanta den un famia hopi musical. Mi mama, esta señora Annie Kelkboom-Jacobs, tabata un pianista grandi den su epoca. E tabata duna conciertonan di musica clasico den e edificio cu awe ta Stadhuis. Na comienso mi tabata practica Harpa riba mi mes. Despues cu mi tabata trahando na Joyeria Kan mi tabata bay tuma

les, un luna si un luna no, cerca e maestro di Harpa Carlos Bolivar, na Caracas Venezuela. Tambe mi tabata tin e privilegio di a haya les cerca un di e miho artista di Venezuela, esta Henri Rubio, cu a yega di toca p.e. cu e Orkesta Simfonico di London, Paris y Spaña.

Edgard sa compone su mesun musica?

Si, ami a compone varios number caba, pero te awor aki mi no tabata tin e oportunidad pa trece esaki riba un CD. E plannan t'ey pa bin cu un CD cu musica di Harpa e aña aki. Mi a yega di graba algun piesa si, di Harpa hunto cu Piano, riba e CD di Toty Arends. E CD aki a wordo saca aña pasa y el a haya un hopi bon acogida. Na Aruba e ta un tiki dificil pa bin cu projectonan asina, dor cu nos artistanan local te ainda no ta wordo aprecia suficiente. E ta imposibel pa biba

di bo musica na Aruba, p'esey semper e ta keda mas un hobby.

Edgard ta duna les di Harpa?

Mi ta duna les di Cuarta y Harpa. Nos tin un scol di musica cu yama "Academia Musical Harpa y Cuarta" y nos a caba di cumpli nos 10 aña di existencia riba 26 di maart 2005. Na e momento aki nos tin mas di 100 alumno. Mi tin hende di diferente categoria y edad ta bin tuma les cerca nos. Tur aña nos tin un show cu ta wordo duna dor di e leerlingnan di e Academia, hunto cu algun artista local, manera p.e. Padu del Caribe. E show ta wordo teni tur aña, den e luna di december, na Cas di Cultura y semper el a haya un bon acogido cerca nos hendenan.

Pa mas informacion encuanto les di Harpa of Cuarta, tuma contacto cu Sr. Kelkboom na tel.: 583-0952

